



**USAID**  
HUSI POVU AMERIKANU



## REVISTA SITUASAUN – MAIU 2017

### ASUNTU NE'EBÉ PRESIZA TAU ATENSAUN

- ▶ Insidente Violénsia 134 Akontese iha Maiu no Aas Liu Númeru Average (*rata-rata*) 127 kada fulan;
- ▶ Dezempregu Sai Abut ba Konflitu no Rejista Insidente Violénsia 36;
- ▶ Insidente Violénsia 29 Mak Akontese Tanba Lanu no Konsidera Hanesan Númeru Aas;
- ▶ Problema Entre Grupu Arte Marsial (GAM) no Grupu Arte Rituál (GAR) Rejista ho Númeru Aas;
- ▶ Insidente Violénsia Sériu 5 Envolve Pesoál PNTL no 1 Envolve Pesoál F-FDTL;
- ▶ Família, Viziñu no Kolega Sai Hanesan Autór Importante Hodi Akalma no Responde konflitu, Alende Husi PNTL;
- ▶ Envolvimentu Feto iha Insidente Violénsia Nafatin Menus Kompara ho Mane.

### INSIDENTE VIOLÉNSIA 134 AKONTESE IHA MAIU NO AAS LIU NÚMERU AVERAGE (RATA-RATA)

Iha fulan Maiu, Sistema Atensaun no Responde Sedu (AtReS) rekolla insidente violénsia hamutuk 134 no husi númeru ne'e 31.1 % akontese iha Munisipiu Dili. Dadus mós rejista insidente violénsia sa'e maka'as iha Rejiaun Administrativa Espesial Oecusse-Ambeno (RAEOA) ho total insidente 14 no númeru ne'e aas liu kompara ho númeru average (*rata-rata*) insidente 7.1 kada fulan. Razaun seluk tanba sa' e iha fulan Maiu mak hanesan tuir mai:

- Insidente violénsia hahú ho Ema tanba **“La iha Kampu Servisu ka Dezempregu”** hamutuk 38 mak akontese iha Maiu ka hamutuk 19.15%. Númeru ne'e konsidera sa'e maka'as. Husi númeru ne'e akontese dala 14 iha Dili, dala 9 iha Baukau, dala 6 iha Vikeké, dala 4 iha Bobonaru no ida-idak dala 1 iha Covalima, Manatutu no Manufahi.
- Insidente violénsia tanba **“Hemu Tua no Lanu”** hamutuk 29 (14.5%) no akontese barak liu iha Dili dala 9, Baukau no Ermera ida-idak dala 4, dala 3 iha Aileu no Vikeké, dala 2 iha Manatutu no ida-idak dala 1 iha Bobonaru, Covalima, Lautein, Oekusi;
- Insidente violénsia liga ba **“Grupu Arte Marsial (GAM) no Grupu Arte Ritual (GAR)”** mós rejista ho númeru aas nafatin iha Maiu no atu hanesan iha Abril hamutuk 13. Iha insidente 14 mak akontese iha Maiu no husi númeru ne'e iha Dili dala 7, Baukau dala 4, Aileu, Bobonaru no Likisá ida-idak akontese dala 1;
- Insidente violénsia 6 **“Envolve Pesoál PNTL no F-FDTL”**. Iha insidente 5, envolve pesoál PNTL. Insidente 4, envolve pesoál PNTL uza pistola hodi tiru ba ema no tiru ameasa. Insidente 3 akontese iha Dili no 1 iha Letefoho-Ermera. Enkuantu insidente 1 seluk

Total Insidente Violénsia iha Maiu 2017	
Munisipiu	Insidente
Aileu	5
Ainaru	4
Baukau	10
Bobonaru	7
Covalima	5
Dili	42
Ermera	9
Lautein	5
Likisá	10
Manatutu	5
Manufahi	7
Oekusi	14
Vikeké	11
<b>Total</b>	<b>134</b>


mak pesoál PNTL baku ofisial CNE iha Sanane, RAEOA (Ia uza pistola), iha Edifisiu CNE tanba problema pasadu. Enkuantu insidente 1 envolve Pesoál F-FDTL akontese iha Coreiu, Lahane, ne'ebé Membru F-FDTL (Ia uza farda) ho kondisaun lanu baku Komunitade ne'ebé fa'an sate no estraga fatin tunu sate nian.

Dadus mós rejista pontu importante katak, insidente violénsia ne'ebé akontese, la'ós PNTL de'it mak **“akalma no halo intervensaun”**, maibé familia, viziñu, membru konsellu suku no kolega sira mós akalma no halo intervensaun. Dadus hatudu, PNTL halo atusaun ba insidente 61 husi insidente 134 ka 24.5%, enkuantu familia akalma insidente 16.47 %, viziñu 15.25 %, membru konsellu suku 14.86 % no kolega 10.84%.

**Envolvimentu feto menus liu iha insidente violénsia**, komparasaun númeru dook liu ho mane. Iha Maiu Iha insidente 6 mak feto hahú halo violénsia no iha insidente 107, mane hahú halo violénsia. Iha insidente 18, feto sai vítima husi violénsia no iha insidente 91 mane sai vítima husi violénsia

### DADUS ANNUAL

Tuir dadus monitorizasaun, husi insidente violénsia 134 ne'ebé akontese iha fulan Maiu 2017 hatudu katak númeru insidente sa'e utoan de'it kompara ho númeru average (*rata-rata*) ho insidente 127 kada fulan. Númeru ne'e hatudu katak la iha mudansa boot ba situasaun seguransa iha rai laran.



### KONA-BA REVISTA NE'E

Revista situasaun ne'e relata kona-ba asuntu xave relasiona ho insidente violénsia no tendénsia konflitu husi

kolesaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, husi Postu Administrativu 65, Suku 275 iha Timor-Leste durante fulan Maiu 2017. Belun esforsu atu fahe informasaun ne'ebé up-to-date no serteza ho dadus atual. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus, liuhosi sistema AtReS.

### Informasaun kle'an liu >> [www.atres.belun.tl](http://www.atres.belun.tl)

**Marilia Oliveira da Costa**, Jestor Sistema AtReS: [bylah.belun@gmail.com](mailto:bylah.belun@gmail.com)

**Laurensius Lein**, Especialista Prevensaun Konflitu & Política: [laurensius.belun@gmail.com](mailto:laurensius.belun@gmail.com)

## PREVENSAUN NO RESPONDE BA KONFLITU

### Atividade Prevenção de Conflito Ne'ebé Hala'o Husi Ekipa Sistema Atensaun no Responde Sedu (AtReS)

- ▶ Bazeia dados monitorizasaun insidente violéncia eleisaun prezidensiál 2017, hatudu katak votante balun seidak hatene prosesu eleisaun ho loos nohamosu irregularidade no provokasaun oin-oin. Tanba ne'e, Rede Prevenção de Conflito (RPRK) iha Postu Administrativu 10 hanesan: Aileu, Bazartete, Lospalos, Baukau, Oesilo, Zumalai, Atabae, Cristo Rei, Dom Aleixo no Nain Feto servisu hamutuk ho CNE, STAE no PNTL halo sosialisasaun prosesu eleitoral atu redús violéncia iha tempu kampaña, votasaun no depois votasaun iha eleisaun parlamentár iha Jullu 2017 oin mai.



### Atividade Prevenção de Conflito Ne'ebé Hala'o Husi Ekipa Programa Apoiu Polisiamentu Komunitária (PAPK)

- ▶ Iha fulan Maiu 2017, Ekipa Programa Apoiu Polisiamentu Komunitária (PAPK) realiza enkontru Konsellu Polisiamentu Komunitária (KPK) iha nivel suku no enkontru Konsellu Seguransa Munisiptu (KSM) iha nivel munisiptu hamutuk 14. Enkontru ne'e realiza hodi identifika issue konfliktu ne'ebé mosu iha comunidade no dezeña asaun preventiva, ne'ebé prioridade tuir eskalasaun konfliktu iha suku no munisiptu.
- ▶ Asaun prevenção de konfliktu ne'ebé halo liu husi diseminasaun lei kódigu estrada, papél OPS no KPK iha comunidade no sosialisasaun lei no prosesu eleisaun parlamentár 2017.

### Atividade Responde ba Konfliktu Ne'ebé Hala'o Husi Ekipa Klínika Asesu ba Justisa

- ▶ Atu responde ba Problema rai iha Munisiptu Covalima, Ekipa Klínika Asesu ba Justisa halo Mediasaun ba kazu disputa rai hamutuk 8 liga ba kazu privadu hasoru governu iha programa mega projetu. Iha kazu 2 liga ba problema rai privadu;
- ▶ Halo mós Mediasaun ba kazu rai privadu 1 iha Munisiptu Baukau no Mediasaun ba kazu 1 seluk ligadu ho kompensasaun ba vítima mate husi asidente karreta iha Baukau;
- ▶ Iha loraun 23-24 Maiu 2017, Ekipa Klínika Asesu ba Justisa oferese kapasitasaun oinsá responde konfliktu liga ba disputa rai ba membru Konsellu Suku ba Suku 4 iha Postu Administrativu Maukatar, Munisiptu Covalima.

## DEZENVOLVEMENTU POLÍTICA

### Atividade Advokasia ba Dezenvolvimentu Política Governu nian.

- ▶ Iha loraun 8 Maiu 2017, AtReS realiza workshop loraun ida hodi ko'alia kona-ba rezultadu monitorizasaun eleisaun prezidensiál iha Marsu 2017 no rekomendasaun prinsipál atu hadi'a eleisaun parlamentár iha Jullu 2017. Partisipa iha soru-mutu ne'e mak órgaun eleitoral husi governu (STAE no CNE) no parseiru hotu ne'ebé servisu iha monitorizasaun eleisaun iha Timor Leste, inklui observadór internasionál balun husi Uniaun Europeia (EU);
- ▶ Realiza soru-mutu regular Ekipa Traballu Seguransa iha Fundasaun HAK, Farol Dili, iha loraun 2 Maiu 2017. Iha enkontru ne'e fahe mós relatóriu monitorizasaun Sistema AtReS nian iha eleisaun prezidensiál 2017 no revista situasaun fulan Abril 2017;
- ▶ Iha loraun 10 Maiu 2017, ekipa AtReS partisipa iha sosialisasaun Lei Armas Brankas, Lei No. 5/2017 ne'ebé vigor ona aktu krime ligadu ba GAM no sasán kro'at ho meius rama ambon ne'ebé uza la-tuir nia funsaun. Mosu diskusaun kle'an ho estudante UNTL no partisipante balun ne'ebé la partisipa iha diskusaun inísiu husi proposta lei ne'e rasik. Lei ne'e rasik refilete natureza husi kronolojia insidente ne'ebé AtReS rekolla husi monitorizasaun iha baze ligadu ho uza sasán kro'at hanesan rama ambon hodi hana ema liuliu iha kapitál Dili;
- ▶ Saida mak AtReS halo iha tinan 10 nia laran komesa 2007 to'o 2017. Ho razaun ne'e, iha loraun 31 Maiu 2017, Sistema AtReS konvida nia parseiru sira iha workshop ida ho tópiku "Ko'alia kona-ba Resultadu". Iha ona asaun comunidade 131 ba responde no prevene konfliktu, iha publikasaun relatóriu dezenvolvimentu política hamutuk 13, iha Revista Situasaun hamutuk 61 mak publikasaun no publika mós Alerta situasaun hamutuk 20. Iha workshop ne'e ko'alia mós kona-ba Saida mak akontese kuandu AtReS labele eziste ona iha Timor Leste.

